

GENESIS 1

Anutu waari naapac naapac tasasucnequc. 1: 1-25

Timgiic sinic Anutu waari kama kunim taguc.
Kaa kama moc tamamareguc o kama sigesac defaaguc.
O Anutu ning minii unggoc adi afanga gwaang
farocningganang ira yaareguc. Tiinga kama
kangkamsac taangkanga defaaguc. Kaa Anutu
anesac ning toguc, kama sanganda tec. Adi ning
tuguinga kama fagaaguc. O Anutu waari kama u
ning tanga kaaguc u karengsac. Ning tanga kama
udaga tanga ning idefaguc tiimguk kaa sidiiguk.
Kama yaa munumung sinic taguc waaracning
bumaracni.

Kama 2 ganang uyaac gaa Anutu waari midi
nuaac toguc. Midisac tuguinga kama biniing sige
kabaguc. Anutu waari kama biniing sige wapni

Genesis (1)

kunim ning yokguc. Ning tanga kunim kapmikganang ama guk a usingganang unduuc ama guk.

Kama 3 ganang uyaac gaa Anutu waari midi tuguinga o ama waari bak abanga kuking. Ning tanga kama sinic waari gwaang bineganang suraraapma kadofanga yaareguc. Anutu waari nuaac tuguinga naapac firi naapac mamanaak nananing waari kadofanga yaareguc. Adi kadofanga mirira mandanganang naapayinga mirikguc.

Kama 4 ganang uyaac gaa Anutu waari tuguinga mayam a mayap bam ning kadofaguc. Ning tanga Anutu waari mayam uyaac gaa sidiigac taareguc a mayap bam uyaac gaa tiimgac taarayaapguc. Waarac gaa kama fafaac fagaatac. Nuaacnii mayam mayap adisining kane kama tifaara tifaara tiitaamuc. Fiking nuaacnii tugumungning fiking nuaacnii nana guk ining tiitaamuc.

Kama 5 ganang uyaac gaa Anutu waari tuguinga naasic amaganangni giing waari kadofaguc. Abangaa Anutu waari yaang giriisi kabaabic

ifakadofaguc. Ifakadofiinga urabenga
mandangganang naapayinga mirikguc.

Kama 6 ganang uyaac gaa Anutu waari midi
tuguingga o naapac magaa yongni o biseni gimik
garam naapac mamanaak waari kadofaguc. O naasic
naasic Anutu waari ifakadofaguc o adi urabenga
mandangganang naapayinga mirikguc. Ning tanga
Anutu adi adisining nanasic naapac mamanaak
daabiik kukyamguc u nanga ikiiting.

Anutu waari amiing taguc. 1: 26 - 2: 25

Anutu adi sasuukni marara o amiing totik
ning tonga iguc taguc. Taamingguk amiguk naga
ningyaarac tayaabotik ning tonga iguc tayaapguc.

GENESIS 2

Ning tonga Anutu waari kama bema ami taguc.
Ami tanga iguc gugubik ami waaraacning
kiniingganang figaramguc. Tiinga uriingni waari
bine ganang amanga tipmarakguc. Tipmarakiinga
amiing sinic igara maraaguc. Ning tanga Anutu
waari wapni Adam ning yokguc. Anutu waari feng
sinicguk kaa firi mindiip nananing feng

Genesis (2)

waaracguk girii unggung iropguc. Iropma iguc gaa Adam waaracganang naagara tonga kamaguc. Feng udi ama guk kama wap Iden. Kaa firi nuaacnii biniingganang merafataraguc. Firi ka waa amiing ifamarakning kaa amiing ka firi mindiip u bema nana kungkumak guk mokngang. A firi nuaacnii waa sasuuk iamning. O Anutu waari Adam ning anaguc, o guu ya katatoranga itarotang. Guu firi mindiip ya daabiiksac narotang kaa firi kubiniiksac biniingganang u sasuuk iamning u moc narotang. O guu u nec u nanga suura naakec. O naasic kareng o naasic kadagaang waaracganang naakec. U moc nec waa kungkumakning.

Yaang o magaa keng mamanaak biseni Anutu waari u tanga iguc Adamgac inaagara fonga kukngamguc. Kukngamiinga Adam waari wap idefaguc.

Kaa Anutu waari toguc, o Adam amisac waa kadagaang waarac taaming tangamotik. O taaming tangama o adigok ira o kane fam tugwayaacnangama ikiaantaamuc. Ning tonga iguc o dama taang tipdekguc. Dama taang tipdera iguc adining

gagaa katii kubinik upma bemguc. U bema katii gapmaam nuaac tipfifereguc. Katii waari taaming taguc. Ning tanga Adam tabobu seganga maraainga Anutu waari taaming u naagikngama tonga amaguc. Adam waari u kanga iguc ning anaguc, o guu naagok ningsac baa. Anutu waari naaning gagakna katii bema guu tagaapmac waarac naga gotik wapga taaming. Kiini yaaracning fikiifikii ami daabiik o tim mengbeganang iak o ingaac waaracganang ibinga anga taamni sananga o adi daabiik ningsac iakning. Ningsac ira o sasuksic kubinik kufara mera au ningsac.

Anutu waari ning yangguc, sidi saba ibenga waaracganang miriknic. O naasic mamanaak defatac o sidisac yaaptatoranga iknic.

O adi tim tasase guk mokngang biicsac ikiaagumuc kaa megaang guk moc naaknga ikiaagumuc. Anutu waari naasic naasic taguc u yaapma ana kabaa karengsac naakguc. Kama 6 ganang i taguc.

Kama 7 ganang uyaac gaa Anutu waari kane tasasucnanga mengkura taguc. Mengkura tanga

Genesis (3)

ning toguc, yaa kama nuaacnii mengkuraning.

GENESIS 3

Amiing waari sansaraamik ticing. 3: 1-24

Gimik adi mandagaac tuaang. Kaa gimik waari taaming u ning anaguc, ai indining, ma, Anutu ning saanac firi mindiip fengganang moc niaantaamuc ning saanac wa, ma. Kaa taaming waari anaguc, indi firi mindiip daabiik ya niaantaamuk. Firi nuaacnii biniinggaang meretac u moc niaantaamuk. O indi u bema nanga kungkumak ganang. Kaa gimik waari anaguc, a kungkumak guk mokngang. U nanga o naasic kareng o kadagaang u kumac suura naakantaamuc. Sidi u nanga a Anutu ning daacning ikantaamuc. Adifafong waarac mandagaac saanac. Taaming waari midi u naaknga firi mindiip u kanga iguc kabaa waaracgac maraaguc. Kabaa marara u bema naaguc. Kaa ufiinigac dibiing amiinga naaguc. U nanga adi kumac suura naakgumuc. U nanga naatama igumuc fuksic waaranga yaapgumuc o fuksic sigesac. Ning tanga firi sasaac mantofagumuc.

Genesis (3)

Mantofanga waari taamsasegumuc.

Kibiri Anutu adi fengganang u abanga arengaaguc. Adam imaraaming waari Anutuning kuguraac naaknga anga firi kiiganang kapmoc sepgumuc. O Anutu waari kuu katanganguc, Adam guu indeng. Ami waari anaguc, naa gayang. Naa guuning kuguraac kumac naakarik. U naaknga o naa biicsac waaracgac tanga mutu tanga abanga kapmoc sebarik. O Anutu waari ning anaguc, biicsac ning waa nisic waari gaanac. O firi ka tosefi tangak u bema nangang wa. Kaa Adam waari anaguc, o guu taaming naamgung yaari bema naamiinga nangak. Kaa taaming waari toguc, o gimik waari mandagaac naaniinga firi mindiip i nangak. Anutu waari gimik ning anaguc, guu ning tangang waarac o guu kadak kabakgaganang yangatarotang. Ning tagaabariik waarac guuning irii o taamingning irii waaracguk digarap tiaanting. O guu ingaac adining kayong mung u siac. Kaa adibu faaranga guuning kiiga gukoc. O Anutu waari taaming ning anaguc, guu ning tangang waarac saba iyibeganang guu kagaya girii bemarotang. Kaa guu ufagagacsac naaknga

Genesis (3)

ira abarotang. Tiinga ufaga adisac gaaptatorarotac. Anutu waari Adam anaguc, o guu ining tangang waarac naa munggwak kadagaasi o aya kusung guk ifakadofagaamok. O guu kane girii tiingasac kadofiinga narotang. Fikiifikii ningsac tanga ira auwuuc kumarec. O naa kama bema tagaapmak waarac guu ingac kama tabobu igarec. Ning tanga Anutu waari magaa giknim manggara yamguc. Imiinga waari tasasegumuc. Adam adi taamnining wap Ewa ning yokguc waarac amiing amiing indining mamanic kubinik Ewa.

Adamya Ewaya o naasic kareng kadagaang o adi kumacsac suura naakgumuc. Anutu waari u yaapkeda yangkara taguc. Firi mindiip amiing ifamarakning u nanga kungkumak guk moc matanic ning tonga yangkara taguc. Ning tanga adi yaaptatora amiing angero fam feng kareng u ipmaguc. Ning tanga paip kubinik nuaacnii biniinggaang kamiinga tifik tanga fafaararaguc. Firi mindiip amiing ifamarakning waaracning kadapmang u katatoranga ikiaaging. O imaraaming famaac feng kareng u kabinga feng naroc anga tanga ikiaagumuc.